



Vischnaunca
Tujetsch

Protocol dalla radunonza da vischnaunca

dils 18 da december 2020

allas 20.00 uras ella halla da gymnastica dalla Scola Sedrun

**Protocol dalla radunonza da vischnaunca dils 18 da december 2020
allas 20.00 uras entochen allas 22.00 uras, ella halla da gymnastica
dalla Scola Sedrun**

Presidi: Martin Cavegn (president communal)

Actuar: Simon Collenberg

Dumbravuschs: Patric Deragisch e Sabrina Flepp

Presents: 35 (inclus suprastonza ed actuar)

Perstgisas: neginas

Tractandas

1. Avertura
2. Protocols dils 26 da zercladur 2020 e dils 10 da fenadur 2020
3. Preventiv 2021
4. Orientaziuns
5. Varia

1. Tractanda Avertura / Beinvegni

Il president communal Martin Cavegn fa in cordial beinvegni a tuttas Tuatschinas ed a tuts Tuatschins, als commembers dil cussegl da vischnaunca ed als commembers dalla cumissiun da gestiun tier la secunda radunonza da vischnaunca dil trienni 2020/2023.

Il president communal constatescha che la radunonza ei vegnida convocada tenor las prescripziuns dalla costituziun communal, artechel 30, cun la publicaziun ellas Tuatschinas nr. 24 dils 4 da december 2020 e nr. 25 dils 18 da december 2020 sco era sin la pagina d'internet dalla vischnaunca. Ultra da quei seigi vegniu reparti in messadi en mintga casada.

Ils posts sco dumbravuschs sorprendan Patric Deragisch e Sabrina Flepp.

Las votaziuns vegnan per ordinari fatgas cun maunpli. Tier las votaziuns cun maunpli ei la pluralitad da quels che voteschan decisiva, ein las vuschs ulivas ei la damonda renviada. Ina quarta dils votants presents san pretender scrutini.

2. Tractanda Protocols dils 26 da zercladur 2020 e 10 da fenadur 2020

Martin Cavegn, president communal:

Da niev vegnan ils protocols buca approvai a caschun dalla radunonza da vischnaunca. Quels vegnan mintgamai publicai ella Tuatschina. Silsuenter han ils vischins e las vischinas da Tujetsch la pusseivladad d'inoltrar protestas enviers ils protocols eifer in spazi da 30 dis. Ils protocols ein stai publicai el fegl official dalla vischnaunca "La Tuatschina" nr. 15 dils 24 da fenadur 2020. Per quei motiv proponel jeu da desister da preleger quels. Igl ei vegniu inoltrau neginas protestas enviers ils protocols, aschia che domisdus ein approvai.

3. Tractanda Preventiv 2021

Presentaziun dalla tractanda entras Martin Cavegn, president communal:

Il preventiv 2021 ei in cudisch da duers ch'ei valeivels per la vischnaunca cun tut ils menaschis interns ed accessoris. Medemamein ei quei era in cudisch da duers per la suprastonza communal, il cussegl da vischnaunca, las cumissiuns, las gruppas da lavur ed il pievel. Il preventiv ei era in instrument pil management. Certas expensas ein fixas. Tier quellas havein nus mo pusseivladads restrenschidas da far adattaziuns. Autras expensas ein variablas. Tier las investiziuns ei la situaziun semeglionta. Certas investiziuns ein fixas. Autras investiziuns ein perencunter variablas. Tier quellas investiziuns ei la suprastonza communal obligada da metter prioritads.

La damonda fundamentala ei: *Tgei savein nus prestar ord vesta finanziaria?* Per saver rispunder a quella damonda havein nus elavurau in plan da finanzas per in spazi da 15 onns. Quel cumpeglia tuttas entradas ed expensas da tuttas posiziuns sco era las investiziuns previdas. La gronda part dallas investiziuns van dabien all'infrastructura. Cheutier s'audan vias, projects turistics sco la sanaziun dil Bogn Sedrun e la sanaziun dil baghetg da scola a Sedrun.

Ulteriuras damondas impurtontas ein:

- *Tgei expensas ed investziuns procuran per in augment dil diember dils habitonts?*
- *Daco habitein nus a Tujetsch?*
- *Ord tgei motivs secasan persunas a Tujetsch?*
- *Daco habiteschan certs indigens ord la val, schegie ch'els lavuran a Tujetsch?*

Nus havein pliras persunas che lavuran a Tujetsch, habiteschan denton ordeifer la vischnaunca. *Schai quei eventualmein vid las habitaziuns che corrispundan buca als gavischs ed als basegns dallas persunas ni dat ei auters motivs persuerter?*

Tier l'elaboraziun dil plan da finanzas havein nus budgetau las entradas a moda pessimistica e las expensas a moda optimistica. Cheutras seresulta in spazi, aschia ch'il rendaquen duess mussar in gudogn respectivamein in meglier resultat che budgetau. Concretamein vul quei dir che la suprastanza communal presenta in preventiv da precauziun.

Sche nus prendin il preventiv sut la lupa, croda a nus en egl, ch'ìls pli gronds cuosts seresultan tier las suandontas funcziuns: administraziun generala (frs. 826'500.00), scolaziun e formaziun (frs. 1'872'100.00), traffic (frs. 944'400.00) ed economia publica (frs. 748'950.00). Ils cuosts da personal muntan totalmein a rodund frs. 4.2 milliuns. Las concessiuns ed ils regals nodan ina gronda part dallas entradas. Quella summa munta a frs. 3'003'000.00. Ei setracta cheu da daners che la vischnaunca retscheiva senza far enzatgei persuerter. Cheu han nossas generaziuns precedentas prestau buna lavur.

Il Bogn Sedrun ei uss integraus da niev el quen da vischnaunca. Ils cuosts da personal (frs. 402'500.00) ei l'aulta posiziun da quella partiziun. Vitier vegnan ils cuosts d'energia e pil scaldament (frs. 154'000.00). Sin fundament dil coronavirus ei il Bogn Sedrun staus serraus pliras jamnas uonn, aschia ch'igl ei da quintar cun ina digren tier las entradas.

Il quen d'investziuns 2021 muossa investziuns bruttas da frs. 5'705'000.00. Il baghetg dalla scola a Sedrun vegn actualmein giudicau el connex culla segirtad tier tiaratriembels. Sin fundament dil pareri savein nus definir las mesiras ch'ei necessarias el rom dalla sanaziun pil baghetg dalla scola. Las investziuns per vias e parcadis ein previdas cun ina summa totala da frs. 2'313'000.00. Pil mument essan nus vid reveder la lescha da perimeter, aschia che las determinaziuns che vegnan applicadas tier sanaziuns da vias el rom da proceduras da perimeter egl avegnir, ein transparentas e claras. El rom dalla procedura da perimeter per la sanaziun dalla Via dalla Staziun quenta la vischnaunca cun contribuziuns da perimeter ella summa totala da frs. 570'000.00. L'avertura da quei perimeter vegn aunc inagada repetida miez schaner 2021. Tuts projects dil quen d'investziuns vegnan suttamess el decuors digl onn 2021 cun in messadi correspondent als gremis cumpetents. Ils gremis decidan allura definitivamein, sch'ìls projects vegnan realisai.

In da quels projects ei la tuor da Putnengia. Ei setracta d'in monument per la cultura. L'intenziun ei da menar atras differentas occurrenz culturalas en quei liug. Plinavon ei la tuor da Putnengia colligiada cun las sendas da viandar – pia ina attracziun pils viandonts. La tuor da Putnengia duei daventar in liug da divertiment e recreaziun. Pils Tuatschins ei quei era in monument d'identificaziun.

In ulteriur project ei la casa da giugs a Rueras. L'empredista Riana Deragisch ha elaborau in concept per quei project. La finamira ei da nezegiar igl object sco casa da giugs pils hosps. Cheutras savein nus offerir ad in e scadin ina purschida duront ils dis da mal'aura.

Sper ils projects menziunai essan nus silla tscherca d'in miedi. Dr. Andreas Fischbacher va en paucs onns en pensiun. Nus havein schau elavurar in concept – cun tal mein nus silla tscherca d'in miedi.

Pil mument essan nus era vid redeger in concept da traffic per la vischnaunca da Tujetsch che duei cumpigliar las sendas, las vias ed ils parcadis che secattan sin intschess communal. Quei concept vala sco basa per prender decisiuns davart investiziuns.

Il preventiv 2021 preveda in gudogn da frs. 583'440.00 ed in cashflow da frs. 956'910.00. Il deficit da finanziaziun munta a frs. 3'603'990.00. Ultra da quei muntan ils deivets a miez e liung termin a frs. 9 milliuns.

Sco gia menziunau ha la vischnaunca da Tujetsch elavurau in plan da finanzas per in spazi da 15 onns. Quel cumpeglia pigl onn 2021 oravontut sanaziuns da vias. Igl onn 2022 ei la sanaziun dil Bogn Sedrun cuntenida cun ina summa da frs. 6.9 milliuns. L'energia alpina ha medemamein elaborau in plan da finanzas pils proxims 15 onns. Quel possibilitescha alla vischnaunca da calcular las entradas ch'ella retscheiva da quell'interpresa.

Il capital jester crescha naven da frs. 5 milliuns (2020) sin frs. 16 milliuns (2025). Silsuenter sesminuescha il capital jester tochen igl onn 2035 sin frs. 6 milliuns. La cumpart dil deivet a liung termin per habitont crescha naven digl onn 2020 naven da -frs. 3'981.00 tochen sin -frs. 12'346.00 igl onn 2025. Silsuenter sesminuescha quei indicatur entochen igl onn 2035 sin -frs. 4'267.00. La calculaziun sebasa sin in augment annual tier ils habitonts (*mintga onn +10 habitonts*). Il svilup dallas finanzas che meina ils emprems onns ad ina gronda debitaziun, schai oravontut vid las aultas investiziuns che spetgan la vischnaunca ils proxims onns. En quella calculaziun ein las investiziuns totalas cumpridas. Ils quens annuals che savessen curdar ora meglier che previu ein buca risguardai. Sco gia menziunau ston tuttas investiziuns aunc vegnir sancziunadas dallas instituziuns politicas.

Primus Deragisch, president dalla cumissiun da gestiun:

Nies plaid d'entrada a caschun dalla seduta dil cussegl da vischnaunca ei vegnius publicaus ella Tuatschina. Ord quella raschun selubin nus da serestrenscher sils pli essenzials fatgs.

Sin pagina 18 dil messadi anfleis vus la survesta da finanziaziun dalla vischnaunca. Ord quella vesein nus che la vischnaunca sa cuvierer dallas investiziuns previdas ell'altezia da frs. 4'560'900.00 mo frs. 956'910.00 cun agens mieds. Il capital restont sto vegnir finanziaus cun capital jester. Aschia creschan ils deivets dalla vischnaunca per 3'603'990.00 e quei senza trer en consideraziun ina eventuala sanaziun dil Bogn Sedrun. Perquei duess la devisa dalla vischnaunca esser da far investiziuns cuzzontas e bein ponderadas. Surtut tier investiziuns che caschunan el avegnir onn per onn gronds cuosts annuals eisi d'esser fetg precauts e nus avertin cheu da risguardar giavischs da differentas gruppaziuns. Sin fundament da quels fatgs essan nus da l'opiniun che tuttas instanzas ein obligadas da ponderar da rudien mintga investiziun.

Deivets ein spert caschunai, sanar l'entira situaziun finanziaria dalla vischnaunca ei allura pli hanau, cunzun sch'ins stuess augmentar il pei da taglia, quei che fuss la pli semplia varianta, denton ina meins populara. El preventiv eisi era veseivel che la suprastanza ha entschiet cun las lavurs da sanaziun dallas vias communalas. Nossas vias vegnan a caschunar egl avegnir gronds cuosts, denton ei la sanaziun dallas vias pli che necessaria.

Vus haveis ussa udiu nossa resumaziun ni legiu ella Tuatschina sur dalla situaziun finanziaria da nossa vischnaunca. Il beinstar pertucca in e scadin.

Nus vulein animar da nezegiar il mument per discussiunar il preventiv per igl onn proxim e sperein sin ina viva ed engaschada discussiun. Nus essan pertscharts ch'igl ei buca sempel da refusar giavischs. La fin finala vala ei d'anflar in via che cuntenta a liunga vesta la pluralitad, quei ei buca adina ina semplia via.

Era vulein nus buca tralaschar d'engraziar a mintgin ed a mintgina che s'engascha sin ina moda ni l'otra per il beinstar da nus tuts, giavischond a l'entira populaziun tuatschina ina buna finiziun digl onn e pigl avegnir mo il meglier. Engraziel.

Discussiun:

Tumaisch Valier, vischin da Camischolas:

Ch'ina nova suprastanza ni in niev president ha certas finamiras ei senz'auter da beneventar. Denton arisguard il preventiv presentaus sai jeu buca desister da prender posiziun avon la tractaziun. Jeu sai era buca tralaschar da menziunar ch'igl agir dil cussegl da vischnaunca ei ord mia vesta staus nuncapeivels e nunresponsabels. Senza negina debatta ed objecziuns ha il cussegl da vischnaunca sancziunau il quen d'investiziuns.

Objecziuns tier il preventiv dil quen da gudogn e sperdita 2021:

La suprastanza ha decidu d'augmentar il persunal tier l'administraziun communal. Che tuts gremis ein pervia dall'epidemia pil mument surdumandai e sut squetsch ei senz'auter da capir. Era eisi da beneventar che la suprastanza communal ha elegiu persunal sesents a Tujetsch ed emprova da mantener cheu la lavur. Denton l'argumentaziun dil president d'augmentar il persunal ella dimensiun comunicada, saiel jeu buca acceptar.

Avon paucs onns era il diember dalla populaziun bunamein 40% pli aults che actualmein. Ed il davos temps ha il cantun priu naven biaras incumbensas, denton buca mo en favur dallas vischnauncas. Era l'argumentaziun ch'il persunal stoppi surprender dapli incaricas el rom da projects perschuada in summa buca mei. Ord mia vesta vegn igl entir apparat suflaus si - ei vegn plitost produciu castials ell'aria.

Sch'ils gremis politics drovan entochen 5 onns per reveder ina lescha sco per exempel la constituziun communal ni sch'ei vegn priu aschi nunponderadas decisiuns sco tier la procedura da perimenter per la sanaziun dalla Via dalla Staziun - allura seresulta bia lavur nunproductiva e massa cuosts supplementars. Per quei sedamondel jeu, schebein ei fuss buca cunvegnent d'examinar la structura dils gremis e l'effizienz da pliras spartas.

Cura che la suprastanza communal e l'administraziun han giu elaborau il preventiv, eran ils donnas dallas malauras naturalmein buca enconuschents. Biaras incaricas per metter en uorden l'infrastructura ha la suprastanza communal surdau ladinamein d'exequir. Quei agir ei era da remunerar. Denton supponel jeu ch'ei sto vegnir impundiu aunc bia raps per migliurar aunc biars fatgs. Jeu haiel examinau il preventiv sco era l'introducziun e haiel fatg persenn che quels cuosts ein risguardai negliu el preventiv.

Era negin che quintava che l'epidemia sedarasi aschi fetg sco actualmein e metti l'entira economia en embrugls. Sin fundament da quella sgarscheivla situaziun, sundel jeu dil meini ch'il quen da menaschi ei calculaus bia memia optimistic.

Investiziuns

Ei la suprastanza veramein pertscharta che la vischnaunca sa prestar tontas investiziuns, las qualas portan quasi neginas plivalurs. Persuenter seresultan biars cuosts annuals cuzzonts. Jeu vi mo menziunar dus projects:

Sanziun Via Prau Cumin – Eisi opportun d'investar en ina societad che ha tenor mia enconuschientscha gnanc in timun pli e stuess atgnamein deponer la bilanza. Sche quella vegness suenter a tuttas obligaziuns e presentass in bien project cun ina finanziaziun garantida, fuss ei pusseivel da conceder ina contribuziun ord il fond pil svilup economic.

Parcadis – Avon buca aschi daditg ha la suprastanza communal giu incaricau ina cumissiun per elaborar in concept per parcadis era en connex cun igl eventual project per in resort a Dieni. En biaras vischnauncas ston ils parcadis publics purtar sesez. A Salins propona la suprastanza communal d'ereger parcadis, ils quals las Pendicularas Mustér SA stuess metter a disposiziun sil pli tard cura che l'ustria si Cuolm da Vi vegn construida. Eisi era enconuschent all'actuala suprastanza communal sut tgei cundiziuns ch'igl emprist ei vegnius concedius alla societad menziunada?

Igl ei vegniu menziunau en in protocol tgei deivet per persuna che seigi per la vischnaunca da Tujetsch aunc supportabels. El rapport eisi explicau che la suprastanza communal quenti che la populaziun prendi tier ils proxims onns. Sch'ins examinescha la structura dall'actuala populaziun, ei quei ord mia vesta plitost in siemi. Sch'ei vegn fatg il proxim temps tuttas investiziuns sco calculau, sa ei tgunsch schabegiar ch'il cantun vegn ad intervegnir. Con attractiv ch'igl ei allura aunc da vuler augmentar il diember dils habitonts duei mintga persuna presenta senza giudicar.

Proposta

Sin fundament dils numnai fatgs proponel jeu alla radunonza da vischnaunca da returnar il preventiv e pretender che las investiziuns pigl onn 2021 vegnien reducidas per silmeins frs. 1'500'000.00.

Per che mintga convischina e convischin sappi decider libramein e senza negin squetsch, proponel jeu da far quella votaziun per scrutini.

Martin Cavegn, president communal:

Jeu vi far attents che mintga posiziun dil quen d'investiziuns sto vegnir approvada dils gremis cumpetents sin fundament d'in messadi detagliau. Jeu sesmarvegliel ch'ins vesa tut ord ina optica negativa. Nus havein baghegiu ina halla plurivalenta. Leu ha era negin reclamau. Nus stuein realisar projects per aschia saver augmentar la populaziun. La finamira ei che la gliעד giuvna habitescha vinavon a Tujetsch. Quei contonschin nus mo, sche nus savein porscher enzatgei alla generaziun giuvna.

Votaziun davart las propostas da Tumaisch Valier, vischin da Camischolas:

- a) La radunonza da vischnaunca decida cun 33 vuschs encunter 2 vuschs da buca menar atras ina votaziun per scrutini sur dalla proposta da Tumaisch Valier, vischin da Camischolas.**

- b) La radunonza da vischnaunca decida cun 33 vuschs encunter 2 vuschs da buca returnar il preventiv cun la supplica da reducir las investiziuns previdas per silmeins ina summa da frs. 1.5 milliuns.

Tractaziun dil preventiv dil quen da gudogn e sperdita 2021 e dil quen d'investiziuns 2021

Ei dat neginas damondas ni remarcas dil votants e dallas votantas.

Votaziuns:

- a) La radunonza da vischnaunca approbescha cun 32 vuschs encunter 1 vusch (1 *abstenziun*) il preventiv 2021 dil quen da gudogn e sperdita dalla vischnaunca da Tujetsch.
- b) La radunonza da vischnaunca approbescha cun 31 vuschs encunter 0 vuschs (3 *abstenziuns*) il quen d'investiziuns 2021 dalla vischnaunca da Tujetsch.
- c) La radunonza da vischnaunca decida unanimamein da schar il pei da taglia d'entrada e da facultad per igl onn 2021 sin 95% dalla taglia sempla dil cantun.
- d) La radunonza da vischnaunca decida unanimamein da fixar il pei da taglia sin schischom per igl onn 2021 sin 1.5 ‰.

4. Tractanda Orientaziuns

Martin Cavegn, president communal:

La Confederaziun Svizra ha decidiu da serrar las ustrias tochen la fin da schaner 2021 muort la derasaziun dil coronavirus. La vischnaunca da Tujetsch ha stuiu redeger in concept da schurmetg per la destinaziun Sedrun/Mustér sin fundament dallas determinaziuns stipuladas. Nus sperein che bia hosps visetan nossa destinaziun sur Nadal e Daniev, aschia che las differentas branschas sappien profitar surlunder.

5. Tractanda Varia

Bruno Berther, vischin da Rueras:

En buca ditg stat igl usit "cattar biemaun" avon porta. Astgan ils affons da Tujetsch tgirar quei usit sin fundament dallas prescripziuns actualas en connex cul coronavirus?

Martin Cavegn, president communal:

La suprastonza communal ei dil meini da lubir quei usit. Ulteriuras informaziuns detagliadas en quei connex succedan aunc pli tard.

Bruno Berther, vischin da Rueras:

Fuss ei pusseivel dad arver igl unviern in passadi tras la zona da ruaus digl Uaul Flurin per saver serender sin il Caschlè sco era in passadi sin la via digl Uaul Surrein naven da Plaun Miez per serender sin il Tgom?

Martin Cavegn, president communal:

Jeu prendel bugen encunter quels giavischs. Bugen savein nus seser ensemen per discussiunar ils detagls dallas rutas e tgei che selai far. Nus stuein risguardar en quei connex las zonas da selvaschinas.

Bia hosps van cun gianellas e cuorsa-liunga ella val. Jeu sun dil meini che nus stuein nezegiar il potenzial da quellas duas purschidas.

Reto Schmid, vischin da Sedrun:

Dapi ils 13 da mars 2020 han las casas da giuvenils registrau paucas entradas. Entochen ils 22 da schaner 2021 pernotteschan neginas gruppas en quellas casas. Cuosts seresultan denton tuttina – cuosts per l'electricitad, cuosts per la canalisaziun, taxas da hosps eav. Jeu appelleschel alla suprastanza communal, schebein la vischnaunca savess buca segidar cun las casas da giuvenils.

Martin Cavegn, president communal:

Nus savein buca pagar anavos taglias (taxas da hosps e turissem). La suprastanza ei vid sclarir, schebein ei fuss pusseivel da sustener quels menaschis cun contribuziuns ord il fond per promover il svilup economic. Nus stuein denton emprem stipular sin fundament da tgei cundiziuns ch'in menaschi retscheiva ina contribuziun ord quei fond. Nus prendin encunter la supplica da Reto Schmid e fagein ils sclariments necessaris.

Hans Jacomet, vischin da Sedrun:

Jeu sai buca capir che la hetta da miardas sut la Tgèsa'Alva vegn spazzada. El niev liug (sper il sontget dils Gadius) regia dapli traffic. Uss ston certs vischins ir tochen el niev liug cullas miradas ch'ei in toc pli lunsch naven. Il cussegl da vischnaunca ha fatg neginas objecziuns tier quella fatschenta la mesjamna vargada quei che ha fatg surstar mei. Jeu supplicheschel la suprastanza communal da reponderar quella sligiazion.

Jeu hai fatg attents alla davosa radunonza ch'ei vegn runau bia puorla cun ils camiuns dalla Val da Claus el vitg da Sedrun. Quella puorla fa e buca bein al lom. Eisi capitau zatgei concernent quella problematica?

Martin Cavegn, president communal:

Il sistem culs molocs ei vegnius approbaus dil cussegl da vischnaunca. Sche la sligiazion cuntenta denton buca, savein nus bugen encurir il dialog ed adattar il sistem da miardas, aschia che tal corrispunda als giavischs e basegns.

Guido Monn, genau:

Il cussegl da vischnaunca ha decidiu a caschun dalla seduta digl october ch'ei vegni buca piazzau molocs sut la Tgès'Alva e che la suprastanza communal stoppi ir alla tscherca d'in liug alternativ per la rimnada da miardas. Sinaquei havein nus analisau la situaziun e fixau il plaz sper il sontget dils Gediun sco niev liug per la rimnada dallas miardas. Il cussegl da vischnaunca ha suandau la proposta dalla suprastanza communal ed aschia decidiu da sliugar si ils loghens sut la Tgès'Alva ed el quartier da Niregl. Ils gremis communal ha denton adina la pusseivladad da revegnir decisiuns politicas.

La puorla che deriva si dil Drun ei ina problematica che fatschenta la vischnaunca gia dapi entgin temps. Ils pertuccai han sincerau alla vischnaunca ch'els installeschan ina lavaria el contuorn dalla deponia. Aschia duei la situaziun vegnir migliurada.

Bruno Berther, vischin da Rueras:

Il vischinadi da Rueras ha astga adina puspei sefidar sil sustegn ed agid dalla canzlia, digl uffeci forestal e d'autras partiziuns dalla vischnaunca. Nos giavischs vegnan adempli, leu nua che quei ei pusseivel. Engraziel fetg persuerter.

Beni Hendry, vischin da Sedrun:

Nus havein ina halla da gimnastica ch'ei endrizzata cun ina buna infrastruttura (aultplidaders eav.) – fagein denton buca nez da quella. Jeu hai buca udiu tuts votums e tuttas informaziuns dalla suprastanza. Ultra da quei eran las cefras da certas tabellas ch'il president ha presentau buca legiblas. Jeu supplicheschel da migliorar quellas caussas a caschun dalla proxima radunonza da vischnaunca.

Martin Cavegn, president communal:

Nus vegnin a nezegiar a caschun dalla proxima radunonza quella tecnica e migliorar la presentaziun.

Jeu giavischel a Vus ed a Vossas famiglias bialas fiastas da Nadal ed in bien niev onn 2021.

Sedrun, ils 24 da december 2020

Actuar:
Simon Collenberg

President communal:
Martin Cavegn